



**Pinngitsaaliilluni angerlarsimaffiup avataanut inissiinernut atatillugu innuttaasut eqqartuussissuserisumik ikiorneqarnissaat aamma meeqqat inissinneqarnerannut atatillugu atugassarititaasut, innuttaasut suliap ingerlanerani toqqissisimanermik qulakkeerinniffiginissaat aamma inuit pisinnaatitaaffiannut eqqartuussivimmuut maalaaruteqarsinnaanermik periarfissaqarnissaat pillugu apeqquteqaat aallaavigalugu oqallinnissamik siunnersuut.**

(Siumut)

Qujanaq Siumukkunnut apeqquteqaat aallaavigalugu oqallisissamik uuminnga siunnersuuteqarnerannut.

Demokraatinut pingaartorujorussuuvoq, pisortat ingerlataasa tamarmik aammalu pisortat allaffeqarfiat inuit misinnaatitaaffii aallaavigalugit iliuseqartarnissaat aammalu innuttaasut – minnerunngitsumik meeqqat – inatsisinit illersorneqarnissaat siunertarinqassasoq. Eqqaamassavarput, pisortat ingerlataat tamarmik piummat innuttaasunut sullissisussatut. Innuttaasunut ajunnginnerpaamik sullissisussatut, illuatungaanuunngitsoq.

Meeqqat pinngitsaaliilluni angerlarsimaffiup avataanut inissinneqartarnera ilaqutariinnut aammalu meeqqamut pineqartumut akuliunneruvoq annertoorujussuaq. Ilaqutariinniit meeqqanik arsaarinnittoqartassaaq aatsaat pisariaqarluinnartillugu aammalu meeqqamut ajunnginneruppat tamanna, kisiannili aamma assersuutini takunikuuvugut, pinngitsaaliilluni angerlarsimassiuup avataanut meeqqanik inissinissamik aalajangiisoqartarsimasoq tunngavissaqanngitsunik. Ilaatigut Ombudsmandi isornartorsiuisimalluni.

Tamanna tunngavigalugu pingaartuuvoq, sapinngisamik ilaqutariit meeqqallu inatsisitigut illersorneqarnissaasa qulakkeerneqarnissaat. Demokraatit iluarisimaarpaat, inatsisip allanngortinneqarnissaanut atatillugu imaalissasoq, meeqqat tamarmik, angerlarsimaffiup avataanut pinngitsaaliilluni inissinneqartut, meeqqanut illersuisumik neqeroorfigineqartalissasut. Taassuma meeqqanik illersuisussap suliap ingerlanerani meeqqap pisinnaatitaaffiata qulakkeerneqarnissai isumagissavai qulakkiissallugulu, meeqqap tusaaneqarnissaa. Meeqqap illersuisua pinngitsaalisaasumik angerlarsimaffiup avataanut inissiisarnermut ilungersunartumut sukumiisumik suliamigut ilisimasaqartuussaaq.

Apeqqut soqutiginartoq tassaalerpoq, suliniut taanna naammappa? Danmarkimi soorlu assersuutigalugu sulinermi ileqquuvoq, pinngtsaalisamik angerlarsimaffiup avataanut inissiinermi inatsisileritooqarneq innuttaasumut akeqartinneqarani. Taamaakkaluartorli, Danmarkimi inissiisoqartillugu kukkussutini takusarpugut. Taamaattumik erseqqissassallugu pingaartuuvoq, inatsisileritooqarneq imaangimmat, kukkusoqassanngitsoq.

Demokraatit kissaatigigaluarpaat, Naalakkersuisut misissussagaat, suut kingunerusinnaanersut, toqqaraluarutsigu, ilaqutariit meeqqallu inissinneqarnerminni inatsisileritooqarnissamik



pisinnaatitaaffeqassasut. Tassani pingaartuuvoq misissussallugu, qanoq akeqassanersoq. Pingaarnarpaajungunarporli, misissussallugu, maani nunatsinni inatsisilerituunik taammattunik peqarnersugut taamatut neqeroornissatsinnut. Isertugaataanngilaq, maani nunatsinni inatsisileritut amigaatigineqarmata. Tamannalu aamma isummersuutigisariaqarssavarput. Angusaqarnavianngilagut pisinnaatitaaffinnik pilersitsigaluarutta, piviusunngortinneqarsinnaanngitsunik. Ajornerpaagunimi suliap suliarineqarnerata sivitsorneranik kinguneqassammat, ilaqutariinnullu ataasiakkaanut meeqqamullu annertuumik ajoqutaasinnaasumik.

Demokraatinut pingaarnarpaavoq, pinngitsaalisaaumik ilaqutariit avataannut inissiissoqartillugu sapinngisarput tamaat, meeqqat inatsisitigut illersorneqarnissaat qulakkeerniassagipput tamannalu suleqatigiiffigerusupparput.

Tassalu oqallinnermut Demokraatit isummersuutigigallagaat.